

ZBÓŽNOPRAJENJE

KAPŁANA ALOJSA ANDRICKEHO

SWJATKOWNU PÓNDŽELU, 13. JUNIJA, W DRJEŽDŽANACH

Zbóžnoprajenski swjedžen w Drježdžanach

Něhdže 8.000 ludži z tu- a wukraja wočakuje so na zbóžnoprajenje kapłana Alojisa Andrickeho swjat-kownu pónđzelu, 13. junija, w Drježdžanach. Połojcu z nich móhli katolscy Serbja wučinić. Mjez nimi budu nimo přiwuznych noweho zbóžneho tež sakski ministerski prezident Stanisław Tilich, kotryž před-njese na kemšach próstwu w serbskej rěči. Powšitkownje su wosady, skupiny a kruhi, kotrež maja wosebity zwisk k Alojsej Andrickemu, do wotběha Božeje mše zapřijeći. Nimo toho wustupi serbski projektny chór z něhdže 200 spěwarjemi.

Swjedženska Boža mša

Zbóžnoprajenska Boža mša zahaji so swjat-kownu pónđzelu, 13. junija, w 10.30 hodž. před hłownym zachodom Drježdžanskeje katedrale. Hižo poł hodžiny do toho budže wot 10.00 hodž. zhromadny duchowny přihot. Hłowny celebrant, prefekt watikanskeje kongregacije za swjato- a zbóžnoprajenja, kardinal Angelo Amato, na tutech kemšach zbóžnoprajenski dekret w nadawku bamža Benedikta XVI. přednjese. Z kardinalom wosweći 14 dalšich biskopow a jedyn abt swjedžensku Božu mšu. Mjez koncelebrantami je tež Radworski farar, kanonik Šćěpan Delan, kotryž modli so džěl wulkeho pačerja serbsce.

Wšěm wobdžělnikam wudžěli so programowy zešiwk. W nim su nimo wotběha a kěrlušow – tež serbskich – za Božu mšu a kónčny nyšpor tež pokiwy za mjezyprogram a plan z wažnymi městnami podate. Zešiwki so při zachodach do sektorow wudžěla.

Městna a chorhoje

Za Božu mšu wonka wutworja so wosebite sektory. Předni sektor je za sobuskutkowacych, čestnych hosći, družki, zbrašenych, liturgiskich služownikow, měšnikow a rjadnikow postajeny. Kóždy je přeprašeny, so na Božej mši wobdžělić.

Zbrašeni změja městno w přednim džělu. Teksty přenjesu so tež do gestikulaciskeje rěče. Štóz njemóže tak dołho wonka stać, móže Božu mšu w katedrali z telewizijnym přenjesenjom na jara wulkej wobrazowce scěhować.

Towarstwa a wosady su přeprašene, chorhoje a banery sobu přinjesć. Na procesionje k začahej Božeje mše pak so jenož zastupjerjo Kolpingoweje swójby a serbskich wosadow wobdžěla, kotřiž maja k tomu wosebite přeprašenje. Wšě tamne chorhoje wostanu na swjedženišću.

Rjadowarjo

Rjadowarjow spóznaje kóždy na žołtym wuchowanskim lacu z wotpowědnym napisom. Jich postajenja maja so na kóždy pad wobkedźbować. Policija njemóže informacije k zarjadowanjam podawać.

Přijězd

W bliskosci katedrale móža busy pozastać a ludžom wustup z nich zmóžnić. Štóz z wosobowym awtom přijědže, dyrbi zjawne parkowanišća městna wužić. Tramwajki na tym dnju nimo katedrale njepojědu. Cyły areal Hrodoweho naměsta, Augustusoweho mosta a Džiwadłoweho naměsta budže swjat-kownu pónđzelu za zjawny a priwatny wobchad zaračeny.

Mjezyprogram

Po Božej mši so na wšelakich stejniščach wosady, towarstwa a hibanja na Hrodowym kaž tež na Džiwadłowym naměsće předstaja. Programowe dycki ze Serbami su na jewišću na Hrodowym naměsće

předwidžane. Nimo toho su wšelake zarjadowanja za dźěci, młodzinu a dorosćenych přihotowane. Dokładniše informacije su w programowym zešiwku wozjewjene.

Zastaranje

Na mnohich městnach so jědže a napoje poskića. Přiwšěm ma so z tym ličić, zo syły ludži dla dołhe rynki nastanu. Tohodla je radžomne, sej něšto k jědži a piću sobu wzać. Wobkedźbować ma so, zo njeje na arealu, hdžež su kemše, žadyn chlódk. Tohodla měli wšitcy, wosebje při ćopłym wjedrje, dosć napojow sobu měć.

Nyšpor

Swjedzeń zbóžnoprajenja kapłana Alojsa Andrickeho w Drježdžanach zakónči so z nyšporom w katedrali. Tutón započnje so w 15.00 hodź. Jón wuhotuja mjez druhim chór Budyskeho serbskeho gymnazija a Drježdžanscy kapałnicy. Kapłan Alojs Andricki bě w swojim času prefekt tutoho katolskeho hólčeho chóra w sakskej stolicy.

W telewizy

Telewizijny sćelak MDR wusyła swjatkovnu pónđzelu, 13. junija, w 10 hodź. přinošk k temje „Die Sorben – Ein Volk zwischen Widerstand und Anpassung“. Wot 10.30 do 12.00 hodź. přenjeso originalnje zbóžnoprajenska Boža mša z Drježdžan.

Dalše informacije: www.posol.de